

il fut bien tost mis à mort, sans estre reconneu des Hiroquois, qui luy auroient donné la vie, comme estant de leur nation. Les Algonquins l'auoient pris aillez ieune avec vn sien frere; tous deux estoient baptizez, & tous deux bons Chrestiens; son frere, nommé Pierre *Achkameg*, ayant esté repris par les Hiroquois, se trouua en ce combat; ce fut luy qui se faisit de la femme de Iean Baptiste: laquelle l'ayant reconneu, luy demanda aussi-tost, s'il n'y auoit pas vn Pere de nostre Compagnie dans les Bourgades Hiroquoises? non dit-il, on a tué les François deuant que de venir en guerre; ceste pauure femme pensoit desia à se confesser quand elle feroit arriüée au païs des ennemis; bref il y en eut de bleffez & de tuéz de part & d'autre: mais bien peu du costé des Hiroquois; pource qu'ils estoient sur leurs armes; & que les Algonquins [14] furent surpris dans vn attirail de femmes & d'enfans, & de bagage; si tost que les vainqueurs eurent fait rendre les armes aux vaincus, & qu'ils eurent garrotté ceux qui estoient capables de s'enfuir; ils se iettent sur les vieillards, & sur les enfans, & sur les femmes, qui n'estoient pas capables de les fuiure; ils tranchent, ils coupent, ils taillent, ils bruslent, ils mettent tout à feu & à sang; ils battent, ils frappent, ils arrachent les ongles à ceux qu'ils veulent mener en triomphe en leur païs; vne pauure femme Algonquine, voyant vn sien parent fort bleffé, & craignant que les Hiroquois ne l'acheuaissent, l'enveloppe sur vn traifneau, & le tire apres les ennemis tous chargez de prisonniers & de dépouilles. Ces Barbares, auant que de se diuifer, s'estoient donnez le rendés-vous dans vne petite riuere du lac Sainct Pierre, où ceux-cy arriuerent les pre-